



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno CCCXLVII. ad annum CCCCI.

Parisiis, 1644

Epistola II. Damasi Papae I. Ad Episcopos Orientis.

urn:nbn:de:hbz:466:1-15256

EPISTOLA II. DAMASI PAPÆ I.
AD EPISCOPOS ORIENTIS.

QVOD vestra caritas debitam sedi apostolicæ reuerentiam tribuit, filii honoratissimi, vobisipsis quoque maximo sane honori est. Nam tametsi sancta ecclesia, in qua sanctus Apostolus sedens nos docuit, quo pacto illius gubernacula, quæ suscepimus, tractanda sint, nobis primæ partes deferuntur: tamen confitemur, nos illo dignitatis gradu longe inferiores esse. Verum ob hanc causam omnibus modis laboramus, vti ad gloriam beatitudinis eius, si qua ratione possimus, tandem aliquando perueniamus. Sciatis velim, fratres, nos Timotheum illum profanum Apollinaris hæretici discipulum cum impio suo dogmate iam pridem abdicasse: & ob eam causam credimus reliquias eius nihil in posterum momenti habituras. Quod si antiquus ille serpens semel atque iterum iectus ad suam ipsius pœnam augendam reuixerit, & extra ecclesiam eiectus nonnullos etiamnum fideles suis mortiferis venenis, quibus eos tentare aggreditur, ad exitium trahere non cessat: vos hanc eius astutiam velut pestem quamdam declinate, & recordamini sedulo tum fidei ab apostolis traditæ, tum huius vel maxime quæ est a sanctis patribus in Concilio Nicæno scriptis prodita; inque eam gradum firme defigentes, immobiles perstate: & ne posthac sustinete, vt vel clerici vestri, vel laici, inanes sermones quæstionesve obscuras audiant.

Galat. 1.

Iam enim semel formulam edidimus, vt qui se Christianum profiteatur, illud teneat quod ab apostolis traditum est. Quippe diuinus Paulus sic loquitur: *Si quis vobis euangelizauerit præter id quod accepistis, anathema sit.* Nam Christus Filius Dei Dominus noster generi humano per passionem suam plenissimam salutem reddidit, vt totum hominem peccatis implicatum ab omni peccato liberaret. Hunc si quis aut imperfectam humanitatem, aut imperfectam diuinitatem habuisse dixerit; spiritu diaboli completus, se filium gehennæ ostendit. Itaque quid est cur abdicationem Timothei a me rursus requiratis, qui etiam hic iudicio sedis apostolicæ, Petro quoque Alexan-

driæ episcopo præfente abdicatus est, vna cum magistro suo Apollinare, qui item in die iudicii debitas pœnas & supplicia persoluet? Quod si ille, qui veram spem in Christum vna cum fidei confessione mutarit, velut spem quãdam salutis retinens, alios quosdam, qui sunt leuiiores, ad suam perducatur sententiam: sciant illi, se propterea cum eo similiter perituros, quod in animum aliquando induxerint ecclesiæ Canonis repugnare. Deus autem vos, filii honoratissimi, seruet incolumes.

·EPISTOLA III. DAMASI PAPÆ
AD HIERONYMV M PRESBYTERVM.

Petit vt psallentiam & hymnidicum, sicut ab Alexandro rectore suo & episcopo didicit, ad eum mittat.

Damasus episcopus fratri & compresbytero Hieronymo in Domino salutem.

DVM multa corpora librorum in meo arbitrio allata fuissent, contigit, vt & librum psalmodiarum in meo animo festinus cognoscerem detineri, & memoriam capacitatis meæ imbuere. Cogitavi, frater amantissime & in Christo semper sacerdos, vt secundum septuaginta interpretes & presbyteros, id est, Matthiam & Ptolemæum, Muchium, Sacreum, Hydronium, Pamphilum, Zoaftiten, Didymum, Sanium, Epiphanium, Ciatrem, Simonem, & ceteros, in quantum nostra recurrit conscientia, de septuaginta inuenire vestigia. Peto etiam tuam caritatem, vt sicut a * rectore tuo Alexandro episcopo nostro didicisti, * Græcorum psallentiam ad nos dirigere tua fraternitas delectetur: qui tantæ apud nos simplicitatis indago est, vt tantum in die Dominica apostoli epistola vna recitetur, & euangelii capitulum vnum dicatur, & nec psallentium * mos tenetur, nec * hymni decus in ore nostro cognoscitur. Peto ergo per fratrem & compresbyterum nostrum Bonifacium, vt * lubeat fraternitas tua rei huius nobis aperire vestigia. Missa quinto Kalendas Nouembris, per Bonifacium presbyterum Hierosolymam.

* creator
* in gre-
mio Græ-
corum
psallere.

* vox vlla
resonet,
* hymni-
dicus
* iubeat